

von Wulf Wager

Männer en de Wechseljohr



Es geit nix Lächerlichers als Männer, die en d' Wechseljohr kommat. Doch, sowas geit's wirklich. Ihr missat bloß d' Auga aufmacha. Nadierlich altrat Männer net – sie werdat interessanter. Aber a paar von onserer Spezies machat sich wirklich zom Affa. Wenn denne ihr Testosteronspiegel sich dem Bruttoinlandsprodukt von Haiti nähert, drehat se komplett durch. Achtat amol

auf a paar Kennzeicha, die eindeutig auf Wechseljohr beim Mann hinweist:

- Plötzlich fangt er a, für en Triathlon zu trainiera, obwohl er bis vor a paar Dag no gar net gwisst hot, was des isch.
- Er trenkt Fitnessdrinks statt Trollinger.
- Em Homschoppingkanal bschdellet er sich a Waschbrettbauch-Höllamaschine.
- Er kauft sich a Lederjack' ond a total coole, verspiegelte Sonnabrill' ond nadierlich a Porsche-Cabrio oder a Harley
- Er tönt sich d' Hoor ond isch sauer, wenn ma en druf a'spricht.
- Er schmiert sich a halbe Tub Superstyling-Gel en des, was er Hoor nennt.
- Trotz Haglund'scher Fersenkrankheit will er obedegt no da Kilimandscharo besteiga.
- Er zeugt Kendr emma Alter, wo andere scho Großväter send – allerdings meischt net mit seiner Frau, sondern wahlweise mit seiner Sekretärin oder dr Freundin seiner äldeschda Tochr.

Beobachtat amol die Signale genau. Wenn 'r so was feststellat, no missat 'r aufpassa, sonscht goht's ganze Familiavermöga für a 21-Jährige oder en Baurahof en dr Bretagne druf.

Bis näggschd Woch'

Ihr

Wulf Wager